

同治鄞縣志

第一冊五

鄞縣志卷四十四

人物傳十九

皇朝四

陳僅字餘山號漁珊父鴻漸乾隆四十五年進士由兵馬司指揮遷汀州同知擢肇慶知府與其兄鴻傳並能詩有集行世僅自幼穎悟嘗夜讀爾雅無燈以香炷逐字默記輒能成誦嘉慶十八年舉於鄉以

國史館謄錄議敘知縣道光十三年授陝西咸長知縣修葺書院建宋儒張載祠與諸生講學其間攝定邊亦有惠政十五年調紫陽南山大蝗教民捕蝗法一孟易百錢復爲文禱劉猛將軍并疏於城隍三日有鳩無數飛啄立盡是歲山南郡縣皆報歉獨紫陽無恙邑環境皆山以包穀爲正糧僅慮不能久藏勸民

種番薯以備災縣治俯臨漢江江流之險莫甚於爐子灘商船
屢傾覆僅鳩工修治行者頌之十七年爲鄉試同考官十九年
冬調安康安康之糧舊有禁不得出縣有穀熟錢荒之患兵役
又從中抑勒之民受其困數十年僅力請於大吏撤其禁民慶
更生城北濱漢江屢遭水患隄防傾圮當事者并塞小南門以
斷出路民以爲大憾僅蒞任卽修萬柳長春六隄更勸築登春
隄開小南門增高北城修千工堰二十七年八月大雨十數晝
夜江水驟漲城不沒者數版北門預塞以沙囊水不得入夜半
訛言東隄決居民號泣震天爭南門而出城幾爲空僅徹夜露
立北門當水之衝哀禱水神爲民請命自夕達旦大雨如注而
漲痕忽平若有神助者邑南山爲羣盜出沒之藪白晝肆劫曰
紅籤黑夜偷竊曰黑籤最稱難治僅編行保甲羣盜屏跡回匪

傅正昇白蓮教之餘孽也自楚北來其術詭祕回民被惑者眾
僅密遣隸擒至焚其書杖之卽睡去以硃筆塗其首始覺而呼
痛尋置於法羣回乃靖恆口離城五十里有古樹村民以叢祠
奉之久僅因公下鄉經其地樹神示夢於村民曰明日陳公來
我當避之嗣後不復靈驗其正直爲鬼神所畏如此宰安康十
二年訟庭閒寂民吏相安咸豐元年調咸甯明年興安遭水災
死者無數僅奉檄往恤躬自查訪以賑之至賠補數百金不惜
也明年署漢陰通判旋陞甯陝同知以足疾致仕咸長紫陽安
康諸邑皆立生祠祀之同治七年卒年八十二僅勤於治民所
至多善政公餘尤好讀書經史小學皆有撰著最長於詩得杜

少陵之正傳云

家狀

沈道寬字栗仲父履謙遊學京師補大興籍諸生以四庫館謄錄

議敘選大庾縣典史道寬中嘉慶二十五年進士分發湖南知縣道光二年署道州知州旋補鄴縣六年署茶陵州七年仍回鄴縣鄴地毗連江西廣西兩省多會匪每潛相勾結圖不軌道寬嘗獲一盜詰之知係會匪之黨搜其冊籍數已千人解赴省垣堅請大吏搜捕以銷未萌之患大吏不可未幾趙金龍果作亂鄴之徭民素與金龍往來內不自安咸持械登山爲負隅自固計大吏聞之欲發兵往剿道寬力止之自攜僕數人親至徭峒集各峒長反覆開導諭以禍福眾皆涕泣相率解兵歸農鄴境亦安十五年署耒陽是冬調補桃源桃源額徵錢糧向歸胥吏包辦以羨餘呈官其應納糧值低昂官皆不過而問民甚苦之道寬言於藩司改爲自封投櫃於大堂設櫃令吏之謹厚者司收納花戶應交糧銀酌中定額悉令各自封投並不遺隸下

鄉民歡欣鼓舞投納恐後十七年以年老乞歸而宦橐蕭然乃
寓湖南省垣湘中人士執經問業以得及門爲榮道寬天才卓
絕善詩古文詞精小學著小學蒙識一編尤工書法集諸家之
長自成一體兼工篆刻又諳琴理作操縵易知說詳論轉絃換
調之法所繪山水亦蒼老咸豐二年粵賊竄犯長沙道寬避居
揚州明年寓泰州卒年八十二

家狀

周良劭字友高號抑齋諸生屢試不第遂棄舉業攻詞章喜讀離
騷經每讀已大哭哭已復讀性敦篤事父母以孝聞父既歿猶
時以館穀分諸兄仲兄蚤卒孤寡力任之母嘗迫之就試既去
而母病良劭在省中忽心動卽歸中途冒大雨得寒疾居喪又
毀瘠過哀未數月竟死年三十九良劭有雋才最精於詞曲慷
慨淋漓入宋元人之室他若星歷句股音韻壬遜之學皆有撰

著未成書又以餘力爲書畫篆刻見者珍之

煙嶼樓集

董樞字元中年二十二喪父苦次中有以僞券數百金索償者眾咸不直其事勸質之官樞以衰麻入公庭爲恥乃焚券而償其金母老得風疾扶持臥起朝夕不離左右者二年弟病禱於神願以己算益弟弟竟卒撫其子如子嘉慶戊辰乙亥歲兩饑樞率先捐資放賑前後累千金親族賴以衣食者甚眾傭人有盜物者樞見之勸以改行終不言其短後其人卒改悔能自立乃

始自言之其隱德所施不可勝紀以援例授州同知

黃定文撰墓志

蕭天瑞字步月幼失怙事母孝家窘甚口不言貧其弟偶以衣食告輒止之曰適增母憂耳母年六十六疾幾殆侍湯藥不懈溺器必親滌之每夜潛出禱於東嶽神求減己算以益母壽病果愈越三載始歿哀禮兼盡遂終身不苟葦先是天瑞妻方氏生

一子卒天瑞年僅三十母命續娶曰弟尙無婦兒已有子矣乃爲弟娶婦甫一載而弟婦歿又爲續之妹字人其夫不能給日用天瑞衣食與其曰妹飢吾忍飽乎課甥讀書并授以室甥女于歸嫁奩悉肩任之親族無後者置地收葬與祖墓近曰日後子孫祭掃先塋多備一席卽可無餒立碑識之有蕭某者同姓不宗其人曾力救父危天瑞事之同伯叔旣歿妻老乏嗣養以終身族弟家遭回祿急以緡錢濟之子世林道光二十年舉人

朱緒曾撰墓志

侍父疾衣不解帶亦以孝稱

采訪

范烱字吉暉諸生父汝樵年六十餘遭疾幾不起烱築壇禮斗誓以四十九夜爲期設簿記之每夜三鼓起盥親煮淨茗至壇拜禱尙聞人聲及雞犬聲卽爲不敬不記於簿故一月中或僅得一夜歷七年始展其誠父病尋痊至八十六而終人咸稱爲孝

感所致周志

戴光榮字庚辛諸生生有至性年十一嘗刲股療母疾嘉慶間父
桐客死潮州逾年始得耗光榮慟絕矢於天曰誓必歸骸顧嶺
南去浙六千餘里光榮家貧空無一錢日號泣於人卒無應者
有姑母哀之助十金一敝篋襤被徒步將行友人某爲寫零丁
帖贈之俾困而告諸路時其子培成年十四涕泣請從光榮遂
挈之附賈人子以行榛莽叢雜虎跡交於道信足奔子踏負之
趨達旦至嶺問土人曰梅嶺也脫草屨血痕淋淋然釋其子僵
矣乞漿於老嫗始甦解囊則金已盡乃賣卜於市遇江右賈得
抵廣州問去潮則尙遠父子日流涕狼狽於路出零丁帖遍告
行人見者僉曰孝子也有長者以光榮被儒服館之家旣而至
潮詢其父葬處人無知者道士某指以所至則荒塚纍纍中碑

碣存焉發之得櫬朽不能載收其骨折敗絮被圍裹之皮之篋寄諸道院加鑰焉盜疑其重貲也啟鑰無所得持敗絮棄骨而去越晨道士以告乃置骨小箱而藏之願無以作歸計爲人傭書久之乃得負骨至廣州復偕其子崎嶇以歸道出江右盜復劫其舟出父骨視之盜錯愕曰此孝子也拜而去及抵家葬父於祖塋之側蓋往返已三年餘矣逾數年光榮卒里人稱爲戴

孝子培成後補諸生有文名

馮登府撰傳

郭傳心字存之諸生究心於金谿姚江之學

黃定文撰傳

居母憂人無

有對之一笑者自父歿視叔如父撫孤姪如子四世同居內外

無間言設義塾置贍學田勵其族性耽山水好鼓琴年六十卒

徐錫珪撰墓志

子拱奎道光十七年舉人官開化訓導孫慶禾咸豐元

年舉人

采訪

郭彥桂娶妻袁氏生二子而袁氏亡彥桂撫養二子以父代母親
黨再四勸續婚堅拒不從凡四十六年生平不覩邪色不聽淫
聲鄉里咸重之同時陳義鈞娶妻章氏章卒有二子義鈞年二
十八不再娶上事繼母致敬致慤卒年六十周志張延錡字維湘
好誦朱子小學研究性理諸書娶妻忻氏生二子忻卒延錡年
二十五亦不再娶事父母以孝聞季弟早卒撫其遺孤愛逾己
子彥桂義鈞以咸豐元年旌延錡以同治十年旌采訪

史積蘭字挺標篤於孝友仲季早世撫其孤子俱成人祖墓自樞
密才以下皆修復如故任卹三黨凡寡居乏嗣者畢力周之復
置產以贍闔邑窮孀又集同人爲廣濟堂鋪設江橋草鞦橋東
舊有船埠聯舫櫛比與橋下行船相觸礙潮急直趨往往撞擊
傾覆積蘭捐資購地離橋二十餘丈別築新埠遂無覆舟之患

東錢湖民私利佃漁賂硤夫洩水稍旱卽涸積蘭條陳堰硤諸
事宜勒石永禁並立水則以慎啟閉又置義山百畝收葬骸骨
歲以千計嘉慶十三年歲稔米貴邑紳分局捐賑積蘭主東局
經理悉宜全活人無算卒年七十四周錫撰傳同族積粹字潛夫能
詩有集事親以孝聞母病請於神願減己年益親已而病愈兩浙

輶軒錄

施搏九字圖遠監生自少敦行至老不急嘗仿古人立功過格以
自程勑修宗祠增置祀田戴某家貧負欠以幼女償爲贖歸嫁
士族里有孤寡失依者六家咸使得所以黃公林路皆泥淖周
圍砌石六千五百餘丈遇有稱貸者必與之積四百餘券後悉
焚囊中甕爲之裂土盜徐景範等擾境官捕之未獲率鄉人縛
以獻邑令周鎬重其人稱爲仁勇云周志同時連德彰字志文家

僅小康嘗躬自約省力行施濟其矜恤孤寡以保全名節人或
有不知者歷五十餘年好義不怠嘉慶十年知府廣善手書崇
善敦仁扁其堂孫飛熊道光二年舉人采訪

榮崔立經之後三歲失怙祖作楫撫育之父葬所距家數百武崔
立就塾必迂道過之且拜且哭念不獲事父事其祖益盡孝歲
時伏臘市美饌手烹調以進拜而祝之恐老人不忍獨甘已必
詭作饜飫狀祖年九十餘而終崔立哀痛幾滅性葬祭盡禮繪
像懸室中出入告面如生時族叔某曾一貸崔立錢每朔望必
至其庭長揖而退風雨寒暑無間一日途中遇鄉鄰尊行交臂
過始見之不及與拱立中夜悔恨不能寐詰旦袖夏楚往謁具
述失禮敢請罪生平迂謹多類此

湯家衡
撰傳

咸豐元年以順孫旌

陳良璇字漢玉父士才幼孤苦能自立卒成巨家援例授州同知

贈奉直大夫良璇少時無貲就學而性好書嘗私入鄰塾問字

歸而朗誦之他學者不如也既長孝事二親靡不至親歿哀毀

甚采訪娶孫氏生二子四女而孫卒良璇年僅三十六誓不再娶

或勸之泣然曰吾先人已矣記十餘年中與若共奉侍其又可

忽乎家有一婢請納爲簪室曰吾已有子嗣矣諏吉祀神率女

見於祖謂女曰吾撫汝爲女與兒女輩列姊妹行以齒爲次吾

已默告先人矣今當拜吾膝下呼父者三以定名分眾見之莫

不起敬女尋歸姚氏爲具妝奩與己女同徐錫堯撰墓志良璇性慈好

施凡所貸與雖家人或不知每歲祓於散粟外必有興造人怪

問之曰此古人以工代賑之良法也吾特依倣之耳歲遣人收

租畢親歷各鄉佃家曰吾計友來有務足額而致汝輩鬻妻子

者乎或以困乏告則資以來歲之本其尙義若此由國子生議

敘州同知卒年五十七宋訪咸豐元年以義行旌周志同時朱叔錞

幼失恃孝事父及後母友於兄弟勤苦所入不以毫髮私娶李

氏生子季盛妻旋死叔錞年二十八不再娶五十四卒宋訪

陳良琨字兆揚一字珊洲良琨弟天性篤摯父病刲股求療居喪

哀禮交盡事良琬如父者垂二十年童槐撰傳以兄鰥居移榻侍其

寢寤言或達旦宋訪性謙謹恥爲物先然見義勇爲如濬城河設

義學及增奉化育嬰堂經費皆率先助資濬河之役鄰屋礙道

良琨慮其蕩析毀己牆以代又因穿水倉官道壞缺旁割私地

補益之城東大涵山下路最險良琨治之成坦途焉嘉慶戊辰

乙亥邑歲祲良琨偕兄出粟賑之道光壬辰至甲午復連祲當

道集諸富戶勸捐多相顧逡巡良琨慨然先書之所輸數最巨

童傳既而設局放賑

周志

晨夕在事雖疾作不少懈竟疲憊以卒年

六十卒之日邑人咸失聲哭曰今而後尙有以捄人飢爲己事

如陳君者乎良琨生平勸建宗祠爲遠祖置墓田歲時賙恤親

黨以至施棉施藥物施櫓皆自一本推意常若有歉者蓋絕無

德色云嘗援例捐理問衙尋以義學議敘晉階奉政大夫

童傳

豐初以悌弟旌子賢諤字論一端厚寡言笑待兄弟極友愛好

義樂施蓋家法也同時劉大文字斐堂事兄大良甚恭入則隅

坐出則隨行後大良別築新居大文有一鮮之割必先以奉兄

兄弟年七十餘怡樂無間里人稱友愛者恆舉以爲法陳世燮

字理陽監生少孤奉母必致甘旨與兄世望世堅別籍居世望

歿事寡嫂五十年如一日世堅病疫或戒勿往曰豈有兄弟急

難而視若途人者乎遂朝夕往及卒躬治喪葬挈遺孤四人以

歸教養婚嫁無異所生性寬厚待戚族有恩一時稱爲長者

采訪

徐桂林初名太茂以字行更字安國父廷芳爲三子析產桂林以宅讓兄以田與弟自治生得餘贏復爲兄償逋弟粥其田贖歸益之爲祭田勸祠堂於大墩設義莊廩族孤寡祠左建敦本義學右建崇本書院置田買山爲經費邑令程璋興四小學桂林以田百畝歸柳汀義學中東津浮橋歲久愈敗桂林造二大舟支於中而新其東壞岸後巡道李可瓊將大修聞前事與決策桂林首捐千金親督工役潮退則往昏夜大風雨無少間五月而成以塗租供歲修載其程式於碑鎮海夏太婆礁常破舟溺人桂林表大木其上繫以銅鈴遠有見聞礁不爲害縣西南風崩礮五門而河上三橋皆狹小納淡則水緩而溉田少下暴則水急而覆舟易桂林擇三橋最小者易地更造亦五其門礮港